

Sambanwá

GIYA SA PAGSAMBA KAN BANWAAN NIN DIOS

SOLEMNIDAD KAN INMACULADA CONCEPCION NI SANTA MARIANG VIRGEN
08 DICIEMBRE 2021 • PUTI

RITO SA PAGPOÓN

Pataratara

C — Kan taon 1854 ipinagdeclarar ni Papa Pio IX an daing-digtang Pangidam ki Maria bilang sarong katongdan nin pagtubod (dogma) nin lambang Catolico. Sa kapinônan pa sana kan plano nin Dios pinili na si Maria na magin Ina kan Paratubos. Nin huli kaini si Maria ilinikay nin Dios sa kasâlan na original na gikan ki Adan asin ki Eva poon sa pagpangidam saiya. Sa bilog na pagkabuhay ni Virgen Maria, sa tabang kan gracia nin Dios, dai siya nadigtaan nin anoman na kasâlan. Kaya an angel sa saiyang pagdalaw ki Maria nagsabi: "Tara, panô ka nin gracia: an Kagurangan yaon saimo, pinaorog ka karahay sa mga babaeb gabos." Sa espíritu nin kapakumbabaan, kita gabos madolok asin mag-arang sa Dios na: itugot niya sa satuyang mga gawe-gawe an kabinian ni Maria, sa satuyang puso an saiyang dakulang pagtubod.

Antifona sa Paglaog

(Is 61, 10)

(Sinasambit kun mayo nin Awit sa Paglaog)

Tunay na mag-oogma ako sa Kagurangan, asin magrorokyaw an sakong kalag sa sakong Dios; ta binadoan niya ako kan gubing nin kaligtasan, asin pinatos niya ako kan manto nin katanosan, siring sa esposang pinagayon kan saiyang mga alahas.

Pagpangurus asin Pagtaong-galang (Tindog)

P — Sa ngaran kan Ama, asin kan Aki, asin kan Espíritu Santo.

B — Amen.

P — An Kagurangan mapasaindo.

B — Asin sa saimong espíritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magelebrar kan mga banal na misterio.

Gabos — Nagkukumpisal ako sa Dios na makakamhan, asin saindo, mga tugang, ta nagkasalà ako nin makuri sa isip, sa tataramon, sa gibo, asin sa kapabayaan: salà ko, salà ko, makuring salà ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangan tang Dios.

P — Maherak man lugod satô an Dios na makakamhan asin, pakapatawada an satong mga kasâlan, darahan kita sa buhay na daing kasagkoran.

B — Amen.

Kagurangan, maherak ka

P — Kagurangan, maherak ka.

B — Kagurangan, maherak ka.

P — Cristo, maherak ka.

B — Cristo, maherak ka.

P — Kagurangan, maherak ka.

B — Kagurangan, maherak ka.

Kamurawayan

Gabos — Kamurawayan sa Dios sa kaitaasan asin sa dagâ katoninongan sa mga tawong marahay an boót. Inoomaw mi ika, ronorokyaw mi ika, sinasamba mi ika, pinapamuraway mi ika, pinapasalamat mi ika huli kan dakula mong kamurawayan, Kagurangan na Dios, Hadeng langitnon, Dios Amang makakamhan. Kagurangan Aking Bogtong, Jesu Cristo, Kagurangan na Dios, Cordero kan Dios, Aki kan Ama, ika na nagpaparà kan mga kasâlan kan kinaban, kaheraki kami; ika na nagpaparà kan mga kasâlan kan kinaban, akoa an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangan, ika sana an Orog Kahalangkaw, Jesu Cristo, kaiba kan Espíritu Santo: sa kamurawayan kan Dios Ama. Amen.

Colecta

P — Mamibi kita.

O Dios, na huli kan daing-digtang Pangidam ki Virgen Maria, nag-andam ka nin maninigong eerokan para sa saimong Aki, namimibi kami na mantang linigtas mo siya sa gabos na digta, huli kan pagkagadan kan saimo man sanang Aki, na bâgo pa, saimo nang aram, huli kan saiyang pamibi, kami man na nalinigan warasan na makaabot saimo. Huli ki Jesu Cristong Kagurangan ni amo, saimong Aki, na kaiba mong nabubuhay asin naghahade, kasarô kan Espíritu Santo, Dios, sa gabos na kapanahonan kan mga panahon.

B — Amen.

LITURGIA KAN TATARAMON

Enot na Babasahon (Tukaw)

(Genesis 3, 9-15, 20)

Nin huli ta mayo sinda nin maimbod na pagsarig sa plano nin Dios, si Adan asin si Eva nagin oripon nin kasâlan. Alagad sa tahaw kan kasâlan na ini asin nin karâtan kan kinaban nanuga pa giraray an Dios na maglitas sa tawo nin huli ta siya maheherakon.

Pagbasa sa Libro nin Genesis.

Alagad inapod nin Kagurangan Dios an lalaki, "Haen ka?" Nagsimbag siya, "Nadangog taka sa tatamnan; natakot ako kaya nagtago ako huli ta ako huba." "Siisay an nagsabi saimo na huba ka?" an hapot nin Dios. "Nagkakan ka kan bunga kan kahoy na ipinapangalad ko?" Nagsimbag an lalaki, "An babaeng itinao mo tanganing magin kaibahan ko iyo an nagtao sako kan bunga, kaya nagkakan ako." Hinapot nin Kagurangan Dios an babaes, "Tano ta ginibo mo ini?" Nagsimbag an babaes, "Dinaya ako kan halas kaya nagkakan ako." Dangan tinaraman nin Kagurangan Dios an halas, "Huli ta ginibo mo ini, isinusuma taka sa gabos na hayop. Poon ngonian magkakamang ka asin

kabokabo an saimong kakakanon sa bilog mong pagkabuhay. Papag-iwalon ko kamo asin an babaes; an saimong banhi asin an saiyan banhi: rurunoton kaini an saimong payo, asin hahampakon mo an saiyan bool." Eva an inginaran ni Adan sa saiyan agom, huli ta siya an ina nin gabos na tawo.

Tataramon kan Kagurangnan.
Gabos — Salamat sa Dios.

Salmo Responsorio

(Salmo 126, 1-2. 4-5. 6)

S — Mag-awit sa Kagurangnan nin bâgong awit huli ta guminibo siya nin mga ngangalasan.

1. Mag-awit nin bâgong awit sa Kagurangnan, huli ta guminibo siya nin mga ngangalasan! Sa sadiri niyang kapangyarihan asin banal na kusog nakamtan niya an kapanganahan. (S)
2. Ipinahayag nin Kagurangnan an saiyan kapanganahan; ipinahiling niya sa mga nacion an saiyan kapangyarihan sa paglitas. Naromdoman niya an danay niyang pagkamoot asin pagkamaibod sa harong nin Israel. Nahiling kan gabos na poró kan dagâ an kapanganahan kan satuyang Dios. (S)
3. Nahiling kan gabos na poró kan dagâ an kapanganahan kan satuyang Dios. Gabos na dagâ maogmang magkurahaw sa Kagurangnan; omawon siya sa mga awit asin sa mga kurahaw nin kaogmahan! (S)

Ikaduwang Babasahon

(Efeso 1, 3-6. 11-12)

Poon sa kapinônan yaon na kitang mga tawo sa isip nin Dios. Kun kaya kaibahan kita sa saiyan plano nin kaligtasan. Ini totoo orog nang gayo ki Maria na piniling magin ina kan satong Paratubos. Ngonian inaalok kita na magpasalamat sa Dios sa gabos na mga biyaya na iwinaras niya sato ki Cristo.

Pagbasa sa Surat ni San Pablo sa mga taga-Efeso.

Magpasalamat kita sa Dios na Ama ni Jesu Cristo na satong Kagurangnan! Huli ta benedicionan kita diyan ki Cristo, kan gabos na bendicion espiritual sa kalangitan. Bâgo lalangon an kinaban, pinili niya kita diyan ki Cristo tanganing

magin kitang banal saka mayong digta sa atubangan niya. Huli sa pagkamoot, itinalaga kita nin Dios na magin mga aki niya huli ki Jesu Cristo; sadiri niyang kabotan iyan saka katuyohan. Omawon ta an Dios dahil kan saiyan nagsusupay na biyaya na itinao niya satô bilang regalo na yaon sa namomotan niyang Aki! An gabos na bagay nahahaman susog sa plano asin kabôtan nin Dios; huli ki Cristo, pinili niya kami na magin sadiri niyang banwaan dahil sa sadiri niyang katuyohan, na dati niya nang inisip poon sa kapinônan. Kaya kaming mga naenot na naglaom ki Cristo itinalagang mabuhay para sa kaomawan kan saiyan kamurawayan.

Tataramon kan Kagurangnan.
Gabos — Salamat sa Dios.

Pagrokyaw

(Lucas 1, 28) (*Tindog*)
(*Sinasambit kun dai inaaawit an Alleluia*)

**Alleluia, alleluia, alleluia!
Nagdolok ki Maria an angel dangan nagsabi, "An katoninongan mapa-saimo, paladan na babaes! An Kagurangnan yaon saimo!" Alleluia, alleluia, alleluia!**

Evangelio

(Lucas 1, 26-38)

Si Maria napurisaw pagkadangog kan mga tataramon kan angel, nin huli ta dai niya bilog na naintindihan. Alagad sa kadakulaan kan saiyan pagtubod sa Dios, siya nagsimbag: "Uya an oripon nin Kagurangnan: mangyari sako siring sa saimong itinaram." Kita inaalok na magsunod ki Maria na may dakulang pagtubod, pagkamoot asin paglaom sa Dios.

P — An Kagurangnan mapasaindo.

B — Asin sa saimong espiritu.

P — Pagbasa kan Evangelio susog ki San Lucas.

B — Kamurawayan saimo, Kagurangnan.

Kan ika-anom nang bulan kan pagbados ni Isabel, an angel na si Gabriel sinugo nin Dios sa sarong banwaan nin Galilea, na an ngaran Nazareth, sa sarong daraga na an ngaran Maria na nakatalaan nang ikasal ki José, sarong lalaki na gikan sa kapagarakian ni David. Nagdolok ki Maria an angel dangan nagsabi, "An katoninongan mapa-saimo,

paladan na babaes! An Kagurangnan yaon saimo!" Napurisaw si Maria kan mga tataramon na ini asin pinag-isip-isip niya kun ano an kahulugan kaiyan. Kaya sinabihan siya kan angel, "Dai ka matakot, Maria, huli ta nawiwilihan ka nin Dios. Mangingidam ka asin mangangaki nin lalaki; Jesus an ingangaran mo saiya. Magigin dakula siya asin aapodon na Aki nin Kahorohalangkaweng Dios. Itatao saiya nin Kagurangnan na Dios an trono ni David na saiyan ginikanan. Maghahade siya sa kapagarakian ni Jacob sagkod lamang; an saiyan kahadean mayo nin kataposan!" "Paanong mangayari ini na mayo man akong agom?" an hapot ni Maria. Nagsimbag an angel, "Mahilig saimo an Espiritu Santo asin lilindongan ka kan kapangyarihan kan Kahorohalangkaweng Dios. Kaya banal an ipapangaki mo na aapodon na Aki nin Dios. Natatandaan mo an pinsan mong si Isabel? Pinagsasabi na dai siya mangangaki, alagad nangidam siya maski ngani gurang na nin marahay. Ngonian anom na bulan na siyang bados ta mayo nin impossible sa Dios." Nagsabi si Maria, "Oripon ako nin Kagurangnan; mangyari lugod sako susog sa saimong tataramon." Dangan binayaan siya kan angel.

P — Marahay na Breta kan Kagurangnan.

B — Pag-omaw saimo Cristo.

Homilia (*Tukaw*)

Pagrokyaw kan Pagtubod (*Tindog*)

Credo Niceno-Constantinopolitano
Gabos — Nagtutubod ako sa sarong Dios Amang makakamhan, kaggibo kan langit asin dagâ, kan gabos na nahihibil asin dai nahihibil. Asin sa sarong Kagurangnan na si Jesu Cristo, Bogtong na Aki kan Dios, asin namundag gikan sa Ama bagô kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saro sa pagka-Dios sa Ama: huli saiya nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(Sa mga minasunod na tataramon, abot sa asin nani-tawo, an gabos minaduko.)

Asin nani-laman huli kan Espiritu Santo ki Virgen Maria, asin nani-tawo. Ipinako pa sa cruz para satô kan panahon ni Poncio Pilato; nagtios sagkod sa kagadanan asin ilinobong, asin kan ikatulong aldaw nabuhay-liwat susog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katpusan. Asin sa Espiritu Santo, Kagurangan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa sarô, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasâlan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Panô nin pagsarig, magdolok kita sa Ama na marahayon sa gabos na nag-aarang saiya. Mamibi kita saiya.

S — Kagurangan, hinanyoga an samong pamibi.

1. Tanganing an Simbahan padagos na magtaong liwanag asin paglaom sa kinaban na nangangaipo kan kabanalan ni Santa Maria, ipamibi niato sa Kagurangan. (S)

2. Tanganing an mga nahohorasa asin naghahadit makakua nin pagmakulog asin ranga ki Santa Maria sa saindang mga pagsakit, ipamibi niato sa Kagurangan. (S)

3. Tanganing sa paggalang asin pagpa-orog ki Santa Maria sa satuyang buhay asin mga familia, mapararom niato an satuyang pagpahalaga sa saiyang aking si Jesus, ipamibi niato sa Kagurangan. (S)

4. Tanganing an mga naghehelang makamate nin pag-anduyog asin ranga sa karahayan asin pagkamoot kan Dios, ipamibi niato sa Kagurangan. (S)

5. Tanganing an mga gadan mag-ogma sagkod pa man sa katoninongan kan presencia kan Dios asin sa buhay na daing kasagkoran, ipamibi niato sa Kagurangan. (S)

P — Langitnon na Ama, nagpasalamat kami saimo sa mga tataramon nin katoninongan na dara ni Santa Maria sa samuyang maribok na kinaban, tabangi kaming madaog an samuyang mga kasâlan asin hâwasa kami sa kairaroman nin samuyang mga kaluyahan. Huli ki Cristo samong Kagurangan.

B — Amen.

P — An Kagurangan mapasaindo.

B — Asin sa saimong Espiritu.

P — litaas an mga puso.

B — Initias mi na sa Kagurangan.

P — Magpasalamat kita sa Kagurangan, satuyang Dios.

B — Maninigo asin Dapat.

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangan, banal na Ama, Dios na makakamhan na daing kasagkoran huli ki Cristo samong Kagurangan:

Ta linigtas mo an orog kapaladan na Virgen Maria sa gabos na digta kan pinaka-enot na kasâlan, tanganing sa saiya na sinamnohan mo kan kapanoan kan saimong gracia, nag-andam ka kan maninigong Ina para sa saimong Aki, asin tinandaan mo an kapinônan kan Simbahan, an saiyang magayon na Esposa, daing gusot o digta.

Ta an orog kamabining Virgen mangangaki nin lalaki, an daing salang Cordero na nagparà kan samong mga salâ; asin binugtak mo siyang enot sa gabos na magin man sanang agihan nin gracia asin aarogan nin kabanalan para sa saimong banwaan.

Kaya kairiba kan mga koro nin mga Angeles nag-oomaw kami saimo, maogmang nagpapahayag nin pagtubod:

Gabos — Banal, Banal, Banal an Kagurangan Dios ni mga hukbô. An langit asin dagâ pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangan. Hosanna sa kaitaasan.

Pamibi sa mga Dolot

P — Kagurangan, kaugaying akoa an nakakaligtas na sacrificio, na dinodolot mi saimo sa solemnidad kan Immaculada Concepcion ni Santa Mariang Virgen, asin warasan na siring na kami magpapahayag saiya na ligtas sa gabos na digta nin kasâlan huli kan saimong naenot nang gracia, kami man, huli kan saiyang pamibi, makaligtas sa gabos na kasâlan. Huli ki Cristo samong Kagurangan.

B — Amen.

Prefacio

An misterio ni Maria sa Simbahan

Pamibi sa Eucaristia (Luhod)

P — Misterio kan Pagtubod.

B — An pagkagadan mo, Kagurangan, ipinapamareta ni amo, an Pagkabuhay mo liwat ipinapahayag, sagkod na ika magdatong.

P — Huli saiya, asin kaiba niya, asin sa saiya, saimo Dios Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Ni amo (*Tindog*)

P — Natukdoan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — Ama ni amo, na yaon sa langit: pabanalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad ni amo an mga nagkakasalà samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangan; warasan sa mga aldaw ni amo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — Huli ta saimo an kahadean, asin an kapangyarihan, siring man an kamurawayan sa mga kapanahonan.

P — Jesu Cristong Kagurangan, ika na nagsabi sa saimong mga Apostoles: Katoninongan iwinawalat ko saindo, an sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog susog sa saimong kabotan. Ika na nabubuhay asin naghahade sa kapanahonan kan mga panahon.

B — Amen.

Pagpahayag kan Karoninongan

P — An karoninongan kan Kagurangan danay na mapasaindo.

B — Asin sa saimong espiritu.

P — Magpatinaraohan kamo nin karoninongan.

Cordero

B — Cordero kan Dios, na nagpaparà kan mga kasâlan

kan kinaban: kaheraki kami. Cordero kan Dios, na nagpaparà kan mga kasâlan kan kinaban: kaheraki kami. Cordero kan Dios, na nagpaparà kan mga kasâlan kan kinaban: tawi kami nin katoninongan.

Pag-alok sa Pagcomunion (*Luhod*)

P — Uya an Cordero kan Dios, uya an nagpaparà kan mga kasâlan kan kinaban. Paladan an mga inapod sa pamanggi kan Cordero.

Gabos — Kagurangan bako akong maninigo na ika magdagos sa sakuyang harong: alagad magtaram ka sana, asin an sakong kalag maoomayan.

Antifona sa Comunion (*Sinasambit kun mayong Awit sa Comunion*)

Maria, mga mamuraway na bagay sinasabi dapit saimo ta hale saimo nagsirang an saldang nin katanosan, si Cristo na satong Dios.

Pamibi Pakacomunion (*Tindog*)

P — Mamibi kita.

Kagurangan samong Dios, an mga sacramento na samong inako, magpa-omay samo kan mga lugad kaitong kasâlan, na sa kasâlan na ini, sa naiibang paagi, linigtas mo si Santa Maria sa daing-digtang Pagpangidam saiya. Huli ki Cristo samong Kagurangan.

P — Amen.

Gawe nin Pag-consagra asin Pagdusay sa Inmaculada Concepcion

Ipinapanongod na an pamibing ini sambiton sa gabos na Misa sa Solemnidad kan Inmaculada Concepcion ni Santa Mariang Virgen, pakatapos kan Pamibi Pakacomunion.

Gabos — Minadolok kami sa saimong pangataman, O banal na Ina nin Dios, sa pagsayod ni amo kaining antifona na pinapamibi kan Simbahan ni Cristo sa halawig nang panahon, na ngonian samong pinapamibi giraray sa atubang mo, samong Inang Daing-digta. Kami na kabitang kan Hawak ni Cristo sa nacion ngonian, minapamibi kaining Gawe nin Pag-consagra asin Pagdusay kun saen samong tinitipon an mga paglaom asin kahaditan kan mga Filipino, sa samong kasaysayan ngonian. Ina kan samong nacion, minarokyaw kami sa


tataramon na Pueblo Amante de Maria, an mga tawo na namomoot ki Maria. Nasasabotan mo an samong mga pagsakit asin paglaom. Ika na nakakamate bilang Ina sa saimong mga aki, kan mga pakipaglaban kan karâtan asin karahayan, kan liwanag asin kadikolman, na nagpupurisaw samo ngonian. Ina kan samong nacion, akoa an mga inagrangay ni among mga tinutulod kan Espiritu Santo, na isabi sa kararoman kan puso mo, kugosa nin may pagkamoot nin sarong Ina asin surogoon kan Kagurangan, an samong nacion asin dagâ, na samong itinitiwala asin idinudusay saimo ngonian. Huli ta kami nanggad nagmamakulog sa dagânon asin langitnon na padumanan kan lambang sâro samo asin kan gabos sa samong nacion. Minadolok kami sa saimong pangataman O Mahal na Ina nin Dios, hare mo pagsayumahi an samong pag-arang asin pangangaipo. Sa mga pagsayuma sa kaangotan, pagkulog, asin pag-iriwal na nagbabarang asin nagrurumpag sa samong nacion huli sa mga kasâlan, agawon mo kami. Sa mga kasâlan tumang sa buhay nin tawo poón sa kapinônan kaini, agawon mo kami. Sa pagtumak kan dignidad kan mga aki nin Dios, agawon mo kami. Sa gabos na forma nin injusticia sa samong sociedad, agawon mo kami. Sa mga paglapas sa mga katugonan nin Dios, agawon mo kami. Sa kawaran nin pag-atid-atid kan marhay o maraot, agawon mo kami. Sa mga kasâlan tumang sa Espiritu Santo, agawon mo kami. Hinanyoga, O Ina ni Cristo, O Inang Daing-digta, an mga pag-arang na panô nin paglaom asin pagsakit kan lambang sâro samo asin kan gabos sa samong nacion. Tugotan mo na mamidbid giraray sa samong kasaysayan bilang nacion an daing-sagkod na kapangyarihan kan Kaligtasan, an kapangyarihan kan maheherakon na pagkamoot. Rumpagon lugod kaini an kapangyarihan kan kasâlan asin karâtan sa samo, asin pakamarahayon an samong mga consensia. O Maria Ina ni Jesus asin samong Ina, an samong buhay asin kahamisan asin paglaom. Amen.

Gawe kan Pagdusay kan Familia ki San José

Ipinapanongod na sa ocacion kan pagtatapos kan Taon ni San Jose, an pamibing ini sambiton sa gabos na Misa sa Solemnidad kan Inmaculada Concepcion ni Santa Mariang Virgen, pakatapos kan Gawe nin Pag-consagra asin Pagdusay sa Inmaculada Concepcion.

Gabos — Omawon ka, San José, tanod kan Kagtubos, esposo kan Mahal na Virgen Maria, itiniwala kan Dios Ama an saiyang Bogtong na Aki. Sa saimo, idinusay ni Maria an saiyang tiwala; sa taid mo, si Jesu Cristo nani-tawo. Kasarô kan Kagurangan niamong Jesus asin kan Mahal na Ina, Irinorokyaw mi ika sa lipotok na pagkamoot asin pagranga. Pinipili mi ika sa aldaw na ini na magin samong ama, tanod, asin parasurog. Itinugot kan Dios Ama na kami magpintakasi kaining taon sa saimong kagalangan asin sa maogmang ika-limang gatos na aniversario kan Cristianidad sa samong banwaan. An samong pusong napagpasalamat nagmimidbid saimo bilang dakulang balaog kan Dios sa samo na magin samong kaibahan, paratukdo, panalmingan, asin parasurog sa taon na ini nin Jubileo. Uya kami sa atubang mo, nagdudusay kan samong mga familia asin mga harong bilang mamomoton asin mainataman na ama, hiningowa mo asin tinogdas an buhay kan banal na Familia sa Nazaret. Nakikimaherak man kami saimo na bendicionan mo an gabos ming paghingowa na an samong mga familia magin mga panalmingan kan pagkamoot nin Dios. Hagadon mo man para sa lambang miembro kan samong familia an balaog nin pusog na pagtubod sa mga ipinahayag nin Dios asin magin mga buhay na saksi kan samong pagtubod sa gabos ming gibo. Tabangi kaming itugdok an simbahan sa samong mga harong, sa paagi kan pagsunod sa saimong mga paarog nin matinubod-tubod na imbold, makusog na pagkamoot, asin pusog na paglaom sa satuyang ama. Danay kang andam na magdangog asin mag-utob kan kabôtan kan Ama asin inilikay si Jesus sa anomian na katibaadan. Kami man likayan sa mga peligro na nagraraot sa mga adal kan Evangelio asin mga katukdoan tumang sa familia asin buhay.

Protektaran mo man kami sa samong pakilaban kontra sa mga moral asin pisikal Na mga kakundian sa samong sociedad. Idinudusay mi saimo an samong mga pangaturogan asin kamawotan na magdadara samo sa kaligtasan. Nakikiolay kami saimo para sa balaog na danay na magbubugkos samo bilang familia sa paagi nin totoong Cristianong pagkamoot sa pagkasararo kan Simbahan Catolica. Tukdoa an gabos na mga ama na magin maimbod sa saindang vocacion bilang mga panalmingan kan pagkamoot kan satuyang Ama sa langit. Idinudusay niamo saimo an gabos ming gibo na matabangan an samuyang mga tugang sa saindang mga kasakitan. Sa saimo, San José, kaibahan ni Jesus asin ni Maria, idinudusay mi an samong hawak asin kalag, kaibahan an gabos na kami asin kun anong igwa kami. San José, pahilngan man samo ika bilang ama. Giyahan man kami sa dalan kan buhay. Hagada man para samo an balaog, pagkaherak, kusog nin boót, asin suroga man kami sa anomian na karatan. Amen.



RITO SA PAGTAPOS

Solemneng Bendicion

Santa Mariang Virgen

P — An Kagurangan mapasaindo.

B — Asin sa saimong espiritu.

P — Iduko an saindong mga payo asin maghagad nin bendicion sa mahal na Dios.

An namundag ki Virgen Maria, an Aki nin Dios, nagtubos sa katawohan papagyamanon niya kamo kan saiyang mga balaog.

B — Amen.

P — Inako nindo an kagtao nin buhay huli ki Maria, magdanay kamong maogma sa saiyang mamomoton na pangataman.

B — Amen.

P — Napadigdi kamo sa pagogma sa kafiestahan ni Maria, mapanô kamo kan kaogmahan kan Espiritu asin kan mga balaog sa saindong eeroakan na daing sagkod.

B — Amen.

P — Asin bendicionan kamo kan Dios na makakamhan: an Ama, asin an Aki, ✠ asin an Espiritu Santo.

B — Amen.

P — Lakaw kamo sa katoninongan ni Cristo.

B — Salamat sa Dios.

